

# COMOGLOTTA

Official mensual organ del OCCIDENTAL-UNION


Redaction e Administration : INSTITUTE OCCIDENTAL, CHAPELLE (Vd), Svissia



COMITÉ  
DE  
REDACTION :

Prof. E. de WAHL  
(Estonia)  
Dr Bertil BLOMÉ  
(Svedia)  
Dr H. NIDECKER  
(Svissia)

Nr. 123  
Serie A  
NOVEMBRE  
1938





## EVOLUTION DEL IDÈ DEL LINGUE INTERNATIONAL

### Volapük 1881

Cifef klubama bevünetik nünom kopanales omsik, das al motöfadel masela obsik ostitamon pükati ko litamags. Nütlif plo kompanals binom glatik.

### Esperanto 1887

La estraro de la internacia Unigho sciigas ghiajn anojn, ke ye la naskightago de nia majstro ghi okazigos prelegon kun lumbildoj. La eniro por anoj estas senpaga.

### Ido 1907

La direktantaro de la internaciona Uniono savigas da olua membri ke ye la naskodio di nia maestro ol aranjos diskurso kun lumprojekturi. La eniro por membri esas gratuita.

### Occidental 1922

Li direction del international Union informa su membres que ye li die de nascentie de nor mastro it va arangear un discours con projectiv images. Li intrada por membres es gratuit.

### CURT GRAMMATICA DE OCCIDENTAL

**Infinitives** : Finale -r. Ex. : *fini-r, ama-r, deve-r.*

**Adjectives** : Finale inobligatori -i. Ex. : *micri.*

**Adverbies** : Finale -men. Ex. : *visibil-men, regulari-men.*

**Present** del verbes : li radica sol. Ex. : *tu fini, tu ama, tu deve.*

**Passate** : Finale -t. Ex. : *tu fini-t, il ama-t, noi deve-t.*

**Passate composit** : per auxiliare ha-r. Ex. : *tu ha finit, noi ha videt.*

**Future** : auxiliare va. Ex. : *Tu va finir, il va amar, etc.*

**Conditionale** : auxiliare vell. Ex. : *tu vell finir, yo vell prender.*

**Imperative** : ples, o li radica sol. Ex. : *Ples finir ! Fini !*

**Participie present** : -nt. **Participie passat** : -t. **Gerundive** : -nte.

**Masculin** : -o. **Feminin** : -a. **Plurale** : -(e)s.

Un sol **articul** definit : li. Adjectives invariabil.

**Pronomines personal** : Yo, tu, il, illa, it ; plurale : Noi, vu, ili.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es **li max facil lingue por li majorité del popules.**

Occidental es difuset per li **OCCIDENTAL-UNION** (Sede : **Chapelle, Vaud, Svissia**), quel es neutral in religion e in politica, e per li national societés de propaganda. Li Occidental-Union es directet de un **SENAT**, e del **CENTRAL OFICIE** durant que li **ACADEMIE** decide pri li linguistic formes.

Li **Institute Occidental** in **Chapelle (Vaud), SVISSIA**, responde immediatmen e gratuitmen a omni demandes de information concernant Occidental, su scope, su grammatica e su vocabularium, e coresponde in francés, german, anglés, italian, hispan, Esperanto, Ido, Occidental.

### Ples adherer al OCCIDENTAL-UNION !

#### ACTIV MEMBRE

Annual contribution : a) sviss Fr. 5.— con gratuit abonnement a Cosmoglotia ; b) sviss Fr. 8.50 con abonnement de propaganda (3 exemplares).

#### PROTECTORI MEMBRE

Annual contribution : Adminim sviss Fr. 10.— (recive li abonnement de propaganda ; o 1 abonnement de propaganda por chascun sviss Fr. 10.—).

#### MECEN MEMBRE

Annual contribution : sviss Fr. 50. recive secun desir 1-5 abonnements de propaganda.

#### PERPETUI MEMBRE

Unic subvention de sviss Fr. 500.— recive secun desir 1-2 abonnements de propaganda.

**Ples demandar li carte de adhesion del :**

**Occidental-Union, CHAPELLE (Vd) Svissia.**



## COSMOGLOTTA

**CONTENE :** **De Wahl :** *Pri li decisiones ortografic del francés academie.* — **Berger :** *Li finale del infinitive.* — **De Wahl :** *Reflectiones pri li evolution del. L. I.* — **Berger :** *Li folioteca del laborator intelectual.* — **Scorpion :** *Ex altri campos.* — **Hermann :** *Academic salade.* — *Old stradas.* — *Index.*

## PRI LI DECISIONES ORTOGRAFIC DEL FRANCÉS ACADEMIE

In Cosmoglotta nró 122 esset publicat quelc decisiones del francés Academie. On posse solmen mirar que un talmen qualificat institution publica un talmen insystematic e inscientic labor. Ci on secue li latin etymologie ortografie, ta on secue un simplificat tal, sin que un rasonabil fil o idé vell posser ducer nos : vi *agregation* (L. ad + grex) apu *agglomérer* (L. ad + glomero); *aryen* apu *cariatide*, *philtre* apu *giratoire* etc. Es sanctionat *dessiller* vice *deciller* malgré *cil* etc. On nu scri *fakir*, *kaolin*, secuente li international maniere scriir exotic paroles (vice *faquir*, *caolin*), ma *cafetan* (vice *kaftan* o *caftan*), e *alpaga* vice *alpaca*.

Si on fixa un ortografie, to deve esser fat secun un general e unitari principie, talmen, que chascun mey strax posser saver quel form usar. On posse comprender que che nos li absolut fix ortografie del Occidental ancor ne es introductet. Plures usa li tal nominat historic ortografie, altres desira un simplificat tal secun clar regules. Proque it ne es possibil postular de omni aprendentes que ili mey conosser li latin etymologie, on deve certmen introducter un ortografie simplificat, quant possibil regulari, fonetic e etymologic (in regard de Occidental, naturalmen, e ne del Latin !). Pri ti problema nu labora nor academie, til que un vermen bon e unitari systema va esser elaborat, it recomenda se tolerar un libertá. On forsan reprocha a nor Occidental-Academie laborar tro lentmen. Ma noi lassa guidar nos del principie trovar li ver unitari metode, quel vell satisfar tam li scientic e systematic postulationes quam li regularitá e unitaritá de procedentias. Noi ne desira far un tal decretiv e defectiv labor quam li Academie Francés. Pro to noi peti nor coidealistas haver ancor patientie. It es facil decreter egal quo *si on have li potentie quam li academie francés*. To ha obliviat li autores de Volapük, Esperanto, Ido, etc. Occidental ne posse decreter sin haver potentie o adminim scientie e logic base por stipulationes. It ha durat plu quam 30 annus til que li fundamental principies esset plu minu clarmen decidet. Noi espera que li ortografie detalies ne va prender tant témpor, ma noi ne vole far un demi-labor quel on vell posser con jure nominar "fush-laboruro".

E. de Wahl.

## LI FINALE DEL INFINITIVE

Li págin 340 del « Histoire de la Langue universelle » de Couturat, publicat in 1903, es un typic testimonie del incapacitá del anteyan generation a soluer important problemas del lingue international. Ci it acte se pri li finale del infinitive.

Pos har laudat in Esperanto li finale **-i** e li finales **-as**, **-is**, **-os** del presente, passate e future, Couturat in su Historie scri (trad. de francés a Occ.).

« *Quelc reformatores de Esperanto* (Red. : Ci Couturat alude li unesim partisans del scole naturalistic quam Lott e Wahl) *desira aproximar su conjugation al conjugation latin ; ma ili es ductet admitter un triplic form por chascun tempor (-ar, -er, -ir, al infinitive, etc.) e sacrificar talmen li uniformitá, quel es un capital avantage ; o anc dar a omni infinitives li sam termination (-ar, por exemple) quo ne vale plu bon, nam il es profundmen chocant vider atribuer al termination del unesim conjugation li verbes del tri altres (finar, vidar, recipar, rendar) ».*


Quo di Couturat es tre just ; ancor in 1903, li alternative esset sive li complication del tri conjugationes **-ar**, **-er**, **-ir**, sive li unic finale **-ar** quel es innatural por mult verbes. In 1907 Couturat divent soluer li gordian nod in su Ido, selectet precismen li duesim solution per **-ar**, quel il antey condemnat quam « chocant ». Li fate es sovente cruel ! Quam on posse divinar it, plu tard li Esperantistes ne mancat utilizar li págin 340 por criticar e mocar li conjugation de Ido per li argumentes de Couturat self !

Hodie li aspecte del problema ha completmen changeat per li labores de Wahl. De Wahl ha monstrat que in realitá li finales del verb ne es **-ar**, **-er**, **-ir** ma solmen **-r** ; li vocales **a**, **e**, **i**, apartene al radicale e ne al termination, **nam ili apari in li derivates**, por exemple : audi-**r**, audi-tion, audi-tor, audi-entia. In consequentie paroles quam finar, vidar, audar es « profundmen chocant ».

Li alternative posit de Couturat in 1903 es do fals ; it existe un triesim solution, li ove de Columbus, un solution quel genite li derivates **natural** e quel es tam simplic quam li « chocant » finales de Ido, it es li sol finale **-r** juntet al radica finient per un vocale **-a**, **-e**, **-i**. Do, ne fin-ar, vid-ar, aud-ar, form-ar, etc., ma fini-r, vide-r, audi-r, form-r, etc. ; e li conjugation es : yo fini, tu vide, il audi, noi forma, etc., ne es plu desfacil quam : me fin-as, tu vid-as, il aud-as, ni formac-as, etc.

Quande on studia li long e penibil historie del lingue international, on aprecia ancor plu mult li ingeniositá del divers solutiones trovat de E. de Wahl. R. Bg.

**Quo custat li decovriton de America ?** — Li documentes trovat in Genova ante poc tempor permisse calcular quant custat li decovriton de America. Columbus recivet un summa equivalent a circa 1360 frs sviss, valore actual. Li du capitanes sub su comanda recivet chascun 694 frs e a chascun del marineros on payat un salarie de 9 fr. 30 chascun mensu. Por equipar li naves on expenset 10840 frs. Ye su retorn in Europa, Columbus recivet 17.000 frs in compensation del moné quel il hat avansat durant li viagie. Do on posset calcular que li decovriton America custat circa li actual precie de un viagie in unesim classe de un grand paketbote.





## REFLECTIONES PRI LI EVOLUTION DEL L. I.

Malgré que hodie pos 50 annus de labor pionic de Esperanto noi vide e senti que sub ti flag li idé del L. I. ne va vicer, noi tamen posse constatar, que li genial lingual sentiment de Zamenhof ha visibilmen stabilisat li spíritu del futur L.I., ne in li radical e derivat formes del paroles, ma in li expression del pensas, li consecution del paroles in li frase, li logic e elegant construction del frases self. It es nu quasi li norm general in omni divers interlingues. In lor syntax li divers lingues international es quasi identic inter se e con Esperanto. Li stylistic form del L. I. es preciset por li future. Naturalmen divers micri variationes posse e va nascer, ma li cardinal linea ja es fixat e distinye se de ti de Volapük.



Ma un cose es clar. Un lingue auxiliari quel posse esperar esser introductet quam tal in li practica, deve haver un clar systema de derivation e parol-formation.

Just to esset li cause del grandiosi development de Volapük, e anc de Esperanto, ti ultim adver mult plu lent quam Volapük. E noi vide que omni plu minu successosi lingues secuet ti metode. In ti form Volapük esset li pionero. Ma li syntaxe de Volapük esset sam foren al spíritu European quam su paroles e su etymologic structura.

Esperanto conservante li metode de clar derivation e autonom parol-formation, introductet quam nov idé ti del international radicas e creat anc un syntactic styl.

Ancor in altri direction Esperanto esset un cardinal pionero in li problema del L. I. It es li unesim lingue quel esset vermen parlabil, e mem devenit lingue matrin del infantes in quelc maritages de diferent nationalitá. It talmen ha demonstrat que un constructet lingue ye ocasion posse devenir un lingue natural vivent.

Do, on vell questionar, proquo ne prender Esperanto quam L. I. si it deveni real e vivent. Nu proque it ne es sat international. Altrimen on ya vell posser prender li ancor plu simplic e facil Papiamento del insul Curaçao, quel prof. R. Lenz ha proposit.

In omni casu noi vide que li du unesim pioneros Volapük e Esperanto ha fat valorosi labor sur li via al introduction de un L. I. Ido, de Couturat-Beaufront, quam on ha posset vider del historie del L. I. de prof. R. Berger, ha esset solmen un impediment al natural evolution inaugurat per Lott, Rosenberger e Molenaar, pro que it hat tirat li evolution in un fals direction de mathematic logica, per quo li hodial statu, representat per Occidental, esset retardat.

Esque nu li statu es li final? In ún direction certmen. On ne posse composir un lingue plu international e in sam témpor tam regulari. Provas simplificar e plu regularisar it, quam Novial, monstra que per to it deveni minu international e natural. Omni prova far it plu inter-national, fa it minu regulari. Certmen un natural evolution va eventer quam che omni lingues natural, quande li L. I. va esser introductet completmen, e parlat partú quam quasi duesim lingue matrin aprendet ja in etá infantil.

In quel direction li evolution va ear? Esque in ti del plu rigorosi regularitá secun exemple de Novial, o in ti del acurtation e simplification del long e diferent sufixes secun exemple de « Universal » de Molenaar? It sembla que li leyes del natural evolution del lingues parlat monstra quam verisimil li duesim via.

Nu on vell posser questionar: Pro quo do ne constructer stax un tal lingue, vice ear li via del clar cristallin structura inaugurat per Volapük, Esperanto e li altri successosi lingues?

Pro que un statu final on posse atinyer solmen per li etapes ductent a it e nequande strax e subitmen.

Noi ne deve obliviar, que it es un grandissim differentie *usar* un L. I. e *introducter* un tal!

Certmen it sembla possibil que on vell posser atinyer ti o un simil resultate anc per un altri via. Ma tande on vell dever comensar per un sort de Pidgin quel vell dever tande evoluer in li usation. Talmen ha format-se « Lingue Franca » e Papiamento. Ma evoluer ti lingue a un form usabil anc in li besones de nor alt civilisation e cultura vell postular imens témpor e labores. To vell significar: jettar li tot grandissim labor fat del homes durant li ultim 60 annus, e comensar per un tut nov metode, quande noi ja es presc che li meta (= fine, scope). Adplu noi ne posse calcular in antey ad ú vell posser duxter un tal via, e quant témpor to vell besonar. Li provas fat con li divers pidgines ne es incoragiant. Li exemple de « Papiamento » monstra un evolution de circa 200 annus. Esque noi posse atender tant témpor?

Nor analyse monstra nos que li linea de evolution es clarmen indicat per li syntese de regularitá e naturalitá in li direction del internationalitá, realisat in su hodial stadie per Occidental. It ne ducte un altri via plu curt e plu secur al realisation de nor comun ideale. *E. de Wahl.*





## LI FOLIOTECA DEL LABORATOR INTELECTUAL

Sciente un dissertation, un roman, o solmen un articul de jurnal, chascun laborator intelectual comensa per colecter noticies, un materiale pluminu abundant secun li object a tractar. E ti materies il deve ordinar secun un cert systema por posser trovar in li rect moment li citation o li information desirat. Ti necessitá colecter e ordinar li materiale ha instigat mult intelectual laboratores far to quo on nómina un ceduliere o cartoteca o altri combination de folies, secun li exemple del firmas comercial e del public administrationes. Sempre plu un ceduliere deveni necessari al laboratores intelectual de omni species: jurnalistes, instructores, profesores, scritores, pro que it permisse les economisar témpor e facilisar lor labor. Li folioteca es por li intelectual laborator, quo es li violin o li piano por li musicant, li crayon por li dessinator, to es: su principal instrument de labor.



Ma li systemas de cedulieres adoptet o consiliat til hodie por li intelectual labore ne sembla esser satisfant: ili vell posser esser facilmen perfectionat e deve esser perfectionat, quam omni utensiles.

*Li cartoteca:* Li unesim idé naturalmen venient a ti quel besona un ceduliere es utilizar li systema usat in li bibliotecas: to es un cartoteca composit de litt pezzes de carton, plazzat verticalmen in tiruores. Li rigiditá del cartones permisse deplazzar le rapidmen: procede ideal por li titules, do por li bibliotecas. Regretabilmen it ne es apt por li documentation del intelectual laborator pro du rasones: it es tro custosi e li superficie de chascun carton es presc sempre insuficient; li majorité del textus deve esser scrit sur pluri cartes. Ti cartotecas in tiruores ocupa adplu un tre grand spacie: pro to sol administrationes es sat rich por comprar e logiar les. Al amator es necessari un systema reductent li custas til li minimum e ofertant li maximum de piazza.

*Li classator (ordinator)* comercial por lettres etc., tam conosset, anc ne es apt por li laborator intelectual pro que in it li folies es fixat talmen que inmetter e exprender les besona un cert témpore. To ne es genant in li comercie u li lettres es classificat definitivmen e u special persones es employat por li sol labor de corespondentie. Ma rar es li intelectual laboratores queles posse pagar se un secretaria.

Inplu li classification in un comercial classator es sempre fat secun li alfabetic órdin. Ma li laborator intelectual utiliza presc sempre li classification secun li idéas e su cedulaes deve esser mobil.

On deve do trovar un systema simultanmen rapid, modic e extensibil. Noi crede har decovrit li systema ideal e va descrir it in secuent. It es ja utilisat desde pluri annus del autor de ti articul, quel ha colectet per it plu quam 20.000 cedules pri li L. I., certmen li max complet documentation pri li problema del L. I. Anc nor centrale de Chapelle es nu organisat secun ti systema, quo mult facilisa li labor de nor functionarios. In it chascun interlinguist have su rubrica e in quelc secondes on posse retrovar qualcunc lettre o document desirat, sin alcun hesitation.

*Li carton-covrimentes.* Li exteriori recipient quel noi consilia es constituet de covrimentes ex carton (fig. 5) contenant folies de spess gris paper (fig. 7) inter queles es insertet noticies, lettres, articles de journales. Lu tot, covriment e gris folies forma quasi un libre e piazza se sur li tabules de un ordinari libre-scaf e do ne necessita li compration de un meuble special.

Por li covriment on selecte un gris carton de spessore medial (for-san 2-3 mm). Su dimension deve esser sat grand por que li lettres e circulars commercial normal ( $297 \times 210$  mm) posse esser classificat in it sin esser plicat. Por li gris folies noi posse adopter un altore de 30 cm, quo, con li nase del titul (fig. 7) obliga nos dar al covriment ex carton li altore de 31 cm (fig. 3). Li largore noi va fixar ye 24 cm por haver margine suficent por un eventual vertical repertorie (fig. 9) analog a ti del commercial classatores.

Ex un grand folie de carton noi fa cupar per li papereria pezzes alt de 31 cm e larg de 54-56 cm (nam li du plattes larg de 24 cm e li dorse de 8-10 cm junt have un longore total de 54-56 cm (fig. 2). Li dorse ne deve esser plu long quam 10 cm por que li total « libre » posse esser tenet facilmen in li levul manu durant que li dextri manu folietta it. Si li collection del cedules es numerosi, on distribue it in pluri covrimentes, quo constitue quasi un biblioteca.


*Li formation del covrimentes :* Si vu fa fassonar li covriment per un ligator de libres, tre probabilmen il va comensar per cupar li folie de carton in tri pezzes : li dorse e li du plattes queles il poy va ligar per un toale quam por un libre. To vell esser un erra por nor covriment quel deve restar in un sol pezze, tam rigid quam possibil por que it mey esser facilmen tenet in li manus. Que it ne aperte se totalmen, to ne es important pro que li consultator besona solmen demimen aperter it por prender o introducter un folie. Altri argument : un covriment ex un sol pezze es plu rapidmen fassonat, do es minu custosi.

On save que li ligatores selecte, por li dorse del libres, carton plu tenui quam tis del plattes por que li dorse mey arondar se plu facilmen durant que li du plattes resta rigid. Qualmen arondar li dorse de nor folioteca por dar it li aspecte de un libre sin prender du sortes de cartones? To es facil. It sufice atenuar li dorse cupante li charnires



(AB e CD in li fig. 2), til demi-spessore, usante un cultell, poy deprender li interiori demi del spessore del dorse, raffante tenui bandes de carton. Li interiore del dorse presenta talmen un rugosi superficie, ma to ne es genant pro que it ne es visibil de extra.

It es inutil arondar li dorse in un cav demi-cylindre quam on fa it generalmen in li ordinari ligation de libres. Pos har egalizat quant possibil li spessore del dorse atenuat, on solmen ducte li du plattes del covriment contra unaltru (fig. 3) e li dorse aronda se self.



*Li intoalation del dorse.* Li intoalation ne es indispensabil, ma it augmenta li solidità del dorse e inbella it : un pezze de toale plu grand quam li dorse es decupat (fig. 4) por li ligation del libre. Quo excede li du extremitás del dorse es plicat in li interiore del dorse exactmen quam in li ligation del libre, poy collat per li calid colle ordinari de ligator. Finalmen li covriment presenta se quam in li fig. 5. con su dorse ex toale e su plattes ex gris carton.

Li titul posse esser simplicmen scrit per li manu con un color-crayon. Ti titul evidentmen ne es tre solid : on posse facilmen efaciar it per li gumme. Ma to es un avantagie quando on deve changear li covriment pro augmentation o diminution del númer de cedulae.



*Li folies de classification* : Ti folies destinat a classificar li documentation posse esser de gris paper, quel es simultanmen solid e modic. On fa cupar un cert quantita de ti paper in li dimensiones adoptet, i.e.  $30 \times 24$  cm. In li angul superiori e dextri (fig. 8) on glutina un "nase" ex fort carton, por exemples ex ti orangi carton customli usat por li cartotecas. In fact it es absolutmen necessari que li nase mey esser solid, nam essente salient (prominent) it facilmen curva se, quo es tre genant por li foliellation. Li nase glutina se sub (detra) li gris folie (fig. 8) e sol li parte portant li titul preterpassa ye 1 til  $1\frac{1}{2}$  cm, quo da al tot folioteca un aspect de cuida. Sur li nase on scri li titul del capitul con gross litteres bon leibil per un larg plum (p. ex. plum Redis).

*Li cedulae* : Li gris folies portant li nases servi solmen por classificar li cedulae secun li capitules (rubricas) ; ili ne porta li textus. Li cedulae es constituet de folies de blanc paper de alquant grandore til  $30 \times 24$  cm admaxim, p. ex. articules ciset ex jurnales, noticies, lettres, dessines o fotografies. Omnes es posit inter du folies de classification e gruppat secun centres de interesse, secun idees, secun autores, mem secun li classification decimal. On anc posse ordinar su corespondentie secun li nomines del corespondentes in alfabetic ordin.

Omni cedulae deve restar liber por posser esser deplazzat in casu de beson o deprendet por consultation. Ad ultra on deve scri solmen sur *un later* del paper. On erra si on crede economisar aliquos utilisante li du lateres del blanc folies : nam quande on va voler utilizar su folies, extraer un passagie, intercalar remarcas, on va esser obligat recopiar li revers de chascun folie por posser utilizar li avers, o inversmen.

*Qualmen ordinar su folioteca?* Examinante li fig. 6, on vell posser trovar un defecte in nor folioteca : li folies de classification essente omnes de sam altore, li titules sur li nases covri unualtru. It vell semblar preferibil disposir les in form de scala (ventol), quam in li classatores comercial, talmen omni titules vell esser leibil in sam tempor (fig. 9). Ma tande ti scalation vell esser inmutabil ; it es apt por li ordin alfabetic ; ma it ne es a consiliar por un classification per idees. Li laborator intelectual quel deve composir un articul, un dissertation, ne ordina su documentation alfabeticmen ma secun un logic plan. E ti plan il ne posse fixar desde li comensa in omni su detalies. Max sovente il modifica it sempre durant li developation de su labore.

Li disposition del figura 6 responde do plu bon al postulationes del labor de redaction. Adplu si vermen on desira vider omni titules simultanmen it suffice scalunar les, posiente li tot colection sur un table quam monstra li fig. 7. Li succession del titules es tande leet de bass a supra. On usa ti procede chascun vez quande on have mult documentes a classificar.



Por consultar li folioteca, on posse tener it in li levul manu o posir it sur li genus, apoyat contra li bord del table o anc demi-apertet inter du gross libres quam monstra li fig. 10.

Li *custa* del folioteca. In Svissia hodie gris carton por un covriment custa circa 25 cts., li toale por li dorse li sam precie. Un quinantene de gris folies con lor orangi nase custa anc 25 cts. Do un folioteca custa admaxim 80 cts. sviss; un summa relativmen ancor plu bass por li altri landes. Qui conosse li arte de cartonage, del manual labores, ne deve hesitar fabricar self li foliotecas: to va esser minu custosi quam li compration del comercial classatores queles in ultra ne es apt por li labor intelectual.

R. Bg.

(NB. Li supra articul ha aparit ye li unesim vez in li sviss pedagogic revúe L'Éducateur del 18 junio 1938. Noi reproducte it con li permission del redaction, quel amabilmen prestat li cliché. Reproduction anc partial interdit sin li autorisation del autor.)

---

## SAVE VU QUE...

...it existe 106 divers constellationes; 48 de ili conosset ja del antiqui astrologos.

...sur li westal rives de Africa on fabrica tre usabil sapon ex banan-shelles.

...3064 lingues es parlat in li munde.

...li carbon-tresores de Anglia va esser exhaustet pos 500 annus, e tis de Westfalia va suficer encore por 1150 annus.

...li homes atinye lor max grand pesa solmen in li quarantesim annu del vive.

...li max grand pictura (abstraente de panoramas) es in li palazzo del doge de Venezia. It es long 33,8 metres, e alt solmen de 1,4 metres.

...un pedon marchant omni die durant 12 hores, e in omni hor 5 km, vell besonar 17 annus por marchar a li lun.

...in Thebe on ha trovat mumies con dentes in parte aurificat. Do dentistes existet ja in antiqui Egyptia.

...li max grand plantation de café del munde es trovat in li state brasilian Sao Paulo. It inbrassa 135.000 hectares e have 8 millones de cafeieros.

...helices posse durant pluri dies suportar un frigore de 120 centigradus.

...un orangiero producte durant su vive circa 20.000 fructes.

...in Africa existe in total 67 pyramides de antiqui Egyptia.



## LI AVIATION AUXILIA LI HISTORIE !

Li 12. decembre 1925, li aviator Insall superaviat, ye 700 m de altitá, li planage de Salisbury e li celebri circules concentric de Stonehenge, un del max gigantesc monumentes megalitic del occidental Europa. Subitmen il credet distinyer, ye circa 8 km plu lontan un duesim gruppe de circules, con cretosi macules in ili. Il fotografat li region, ma li fotogramma ne revelat necos altri quam tracies de plugs in li cretosi suol.

Astonat de ti tracies, il revenit planear super li sam loc in juli 1926 e ti vez su patienties esset recompensat. In li mar movent de matur frument, mult plu distintmen quam in li suol hivernal, dessinat se set concentric circules, omnis, marcat, exceptet li exteriori, per lineas punctuat.

Ma quande Insall, ascendent sur un masse de fen, volet vider plu proxim li fenomen, il videt solmen macules plu obscur disperset ci e ta, u li frument crescet plu spess. Li questionat ruranos confirmat li fact que in ti parte del planage li frument crescet tre irregularimen.

Or, por li arkeolog ti irregularitás es un indicie del presentie de prehistoric vestigies. In li planage de Salisbury li humo jacent sur li cret have solmen quelc inches de spessore e li plantes queles ne posse inradicar se in li crete resta debil. Ma in li locos u li prehistoric populationes ha cavat fosses e fores, li bon terra ha acumulat se e li frument es plu alt.

Li explorationes fat de sr Cunington revelat li presentie de 156 fores cavat in li rocc e poy plenat, disposit in 6 concentric circules.

Pro li vicinitá del menhires de Stonehenge on hat in prim suposit que ti fores hat servit a erecter grand lápides. Li explorationes indicat in contrarij que ili hat contenet li base de potent lignin colonnes havent til un metre de diametre. Numerosi osses de boves e svines sembla explicar se per sacrificie de animales. Li interiori circul contenet un tomb con li skelett de un infant : evidentmen li victim de un sacrificie de hom. Restes de potteries permisse datar li sanctuarium al etá del bronze, circa 1500 annus ante J.-C.

Per analogie con Stonehenge, li scientistes ha baptizat li nov station Woodhenge, e ili considera it quam li model por li megalitic monument de Stonehenge self. Ante pluri annus, alcun specialist hat declarat, basante se sur particularitás del construction de Stonehenge, que it devet har esset inspirat de un lignin construction ; li prova de ti origine es nu fat.

It es desfacil preciser li destination del monument de Woodhenge. Esque it esset consacrat al adoration del Sole o al cultu del antecessores ? In omni casus it sembla har servit simultanmen al sacrificies, al reuniones e al dansas. Quande ti forest erectet su gigantesc tordet pilares, portant cranios e cornes de animales sacrificat, it ya dat li impression de ti etá barbaric e primitiv.

Quande li Celtes e li Romanes fat passar lor plugs sur li planage, li ligne esset desde long putrit e li fosses desde long plenat. Al avion sol apartenet li possibilitá decovrir li tracies de ti mysteriori passate.



(*Journal de Genève*, trad. R. B.)



## EX ALTRI CAMPES

Tro sovente on trova in li gazettes esperantistic un manca total de comprensivité pri li labor del altri systemas de L. I. To es precipue debit a un super-estimation de lor propri forties e, quam consequentie, a un despreciation del importantie del systemas concurrent quam Ido, Interlingua, Novial e Occidental queles on generalmen ne mem cita per li nómín, ma simplicmen rangea inter li innumerabil "projectes" de L.I. queles pullula circum Espo, li sol "lingue vivent de un vivent popul." Ma fortunosisimen it existe laudabil exceptiones. In li nr. 984 de HEROLDO DE ESPERANTO noi trova un articul, titulát "UNUECON I (Union) de chef-redactor Theo Jung, in quel li autor predica li necessitá de un reorganisation unitari del movement espistic international. (Li letores conosse ex Cosmoglotta li causes del sisma presentmen existent in li Esperanto-movement). To es un afere purmen intern quel ne concerne nos, ma to quo es interessant, es li franc declaration del autor : *a nos samli quam a Zamenhof, it vell esser pluminu egal, ca nor afere va vicer per Esperanto o per alcun altri lingue (tamen ne minu bon quam Espo), si solmen it vicle !* It es ver que de un mann quam Theo Jung, quel ha dat ja in li passate mult provas de su clarvidentie e objectivité, un tal declaration factli ne astona nos.

In un del precedent numerós de HEROLDO DE ESPERANTO, Sr. ing. Wüster publicat un (ceterli tre interessant) project de normalisation international del scritura. Ti articul despleset a un letor esperantistic quel exfortia defender li autonomitá del ortografies national e fini su response per li declaration : "Noi prefere li derivation ex un unvez acceptet radica al ínlimitat introduction de "paroles international". Just pro to, it ha sempre esset combattet de ti "intelectuales" del sam specie queles creat Ido, Occidental, Novial e. c. Noi mey preservar nos de ti intelectuales, ne solmen internationalmen, ma anc nationalmen !" Sempre li sam historie ! Ma noi mey tranquilisar nos. Li constant interlucta inter "fundamentistes" e "modernistes" in li movement esperantistic ne vell exister, sin li pragma de un grafisme international ja existent sur grand scala. E omni fundamentistes junt ne va impedir li victorie del conceptiones basat sur li natural evolution del grafisme e li factes ja existent.

Amusant confrontation : In li articul "Pro quo noi es esperantistes" (publicat in nr. 6/1938 de l'Esperanto) noi lee : "Do, optim resultat per li minim grand exfortie (poc mensus de studie vice mult annus). " E un poc plu lontan : " Per poc mensus de studie il (li aprensor de Esperanto) va obtener resultates brilliantissim e it va le esser facil far se comprender in omni partes del munde ". (Remarca : It acte se pri un comparison del facilitá de Espo e ti del lingues national).

Durant que sub li titul "Noi mey dir li veritá" noi lee in HEROLDO DE ESPERANTO Nr. 983 : Car comensantes, si alqui di vos que on posse perfectmen aprender Espo in poc dies o semanes, yo peti Vos, ne crede it ! Ne crede it, nam it es un fabul ! "

Ex HEROLDO DE ESPERANTO Nr. 978 : In li 9esim congress del presse tecnic quel havet loc in Paris (septembre 1937) Sr. Rollet de l'Isle rememorat li desir expresset del unesim congress in 1925 : " que Esperanto mey esser usat in li presse tecnic ad-minim por li redaction de resumma pri articules scrit in li lingues national, que it mey esser admisset in li congresses e in li organismes international creat del unesim congress. " Il mentionat in su rapport li successes ja atinyet desde ti témpor del lingue Esperanto e proposit li creation de un jurnal exclusivmen redactet in Esperanto : li presse tecnic mey auxiliar li publication de un tal revue.





E li congress gentilmen adoptet li secuent resolution : « Li 9esim congress del presse tecnic, considerante li propositiones ja presentat in li congresses anteriori, recomenda al revües queles posse far to, publicar resummates de su articules, redactet in un del max difuset lingues auxiliari ». Li raportero hasta adjunter que li resolution esset redactet in ti form diplomatic solmen por que anc li mult congressistes german mey posser aprobar it. Ma on posset constatar que secun li opinion general, li lingue max difuset es Esperanto.

Noi prefere tener nos al textu oficial plu quam al « opinion general ». E secun ti textu Occidental sta in li sam range quam Espo. It es un grand success por nor lingue quel noi debi al Espistes. In omni casu it es desfacil admitter que li efect de ti duesim resolution vell posser esser minu grand por Occidental quam it ha esset por Esperanto de 1925 a 1937.

*Scorpion.*

### Academic salade

Sr Quarfood, president del Ido-Akademio, ha fat in junio de ho-annu un discours pri li lingue international a un litt congress pacifistic organisat de Dr Nilsson in Örebro (Svedia). Center-Bladet de juli-august reproducte ti discours in quel sr Q. mentiona e critica divers lingues. Li passagie concernent Occidental es un perle :

*Occidental (quel have su max mult membres in li trilingual provincias circum Rhein e perdit mult per li incorporation de Austria e li non-favore de Germania) aspecte strangimen e es practicmen desfacil per li anglatri cáos del ortografie.*

Per ti declaration on posse judicar sur quel nivel sta li scientie del president del Ido-Academie. In tam poc paroles it es desfacil acumular plu mult stupiditás e perfidies pri nor movement. Pri quel provincias sr Q. vole parlar ? Svissia ? Ma Svissia es un land liber e ne un provincia. Sr Q. mey aperter un cart geografic por completar su politic conossenties. Per li politic evenimentes omni systemas de lingue international ha perdit, ma li sol scientific revüe german publicant textus in un lingue auxiliari consacra les a... Occidental.

Asserter que Occidental « aspecte strangimen », monstra, til quel gradu li usation del artificial formes ha deformat li gust de cert Idistes : Por ili li paroles natural de Occidental, paroles trovabil in mult lingues national, ha devenit « strangi », durantque li grotesc fabricationes de Couturat, ex. **federuro** vice **federation**, **institucuro** vice **institution** etc.) es lu natural ! Pri gustes on ne deve disputar. Ma on va finalmen vider quo va esser plu fort : li « strangi » naturalitá de Occidental, o li *fabrikuri* de Ido, propagat de sr Q.

Cose interessant : Sr Quarfood usa unvez li plen form con **-as** del verbes, altrivez li form abreviat, tam abhorret del Idistes. Talmen on nequande save ca on deve dir in Ido : **on povas** o **on pov**, **me dicas** o **me dic**, etc. Adplu Sr Q. *anuncia que Ido oferta nu li possibilitá usar li anglés conjugation foneticmen transcrit por contentar anc li partisans del analytism*. Do va exister **du species de conjugation in Ido**. Vice parlar pri li « cáos del ortografie » in Occidental, sr Q. vell far plu bon recapitular li **cáos del derivation de Ido (quel have circa 800 irregulari derivates per -iono, -toro, -enco, etc.)** o li cáos quel il just introduce in Ido desde que il preside su Academie.

Noi constata anc que sr Q. admesse sin votation un nov parol **paxo** diferent de **paco** quel resta por traducter *mental stando di paxo*. Nu ! Esque on va dir in Ido **Oceano paxifika, la paxifo** (— **pacification**), **paxifisto** ? Sembla almen que li ley del analogie, quel sr Q. considera quam « konservant forco en Ido » postula ti formes apu « paxo ».

Finalmen sr Q. informa nos sin rider que li lingues international *accentuant li naturalitá* (e specialmen Occidental) *must faliar*, nam li problema del naturalitá es *nesolvebla* (!) Ja in un lettre publicat in Cosmoglotta-B su compatre sr Röhnisch hat declarat que Occidental es *destruktenda*.

Noi desira mult success a sr Nilsson por su « paxifika » interprende, ma esque il ne posse trovar colaboradores de un minu strett mentalitá ?

*A. Hermann.*



## Old stradas

Li revúe ABC-Magazine de junio 1935 ha consacrat un tre interessant articul al nómines del stradas in Francia. Su autor, Y. Charlet, ha colectet li max pictures e drolli nómines. Noi cita ex ti articul :

«...Li pluparte del stradas debi lor nómin a local circumstanties, concernent historic factes, a costumes, mestieres, usus, direction, reputation, objectes, reclam-tabules. Quam original e humoresc es ti old nómines expressiv.

Oh vé ! de ti stradas ha esset debaptizat por receiver li nómin de mediocri politicos. Tamen on posse ancor colecter li secuent buket : In **Paris** on trova ancor li stradas del Moline del Buttre (Moulin de Beurre), del Cat quel pisca (Chat qui pêche). In **Marseille** : li stradas del Cul del Bove (Cul de Bœuf), del Petre rabiant (Pierre qui rage), del strada Rupte-Cul (Rompe-Cul), del Quar Pasteteros, del Dupatores, del Papagayes, del Mort Fémina, del Scrapa-Solea (Gratte-Semelle), del Angul del Humilitá.

In **Orléans** noi trova li stradas del Litt Sapates, del Old Pectineria, del Cul-Bastonatores, del Nase Argentin, del Arca de Noé, del Capra dansant, del Tri Claves, del Grand Cisoires, del Ecclesia-Sant-Martin-Aure-de-Vacca.

**Bourges** have li strada del Femina Parturient, del Deo de Amore, del Old Piriero, del Rupte-Coll.

In **Toulouse** on trova li strada del Bronn Parlant, debit a un tre audibil ecó proxim al basilica St Sernin.

**Strasbourg** possede li stradas del Fox-Predicant-al-Ganses, del Coclare-del-Pott, del Pede del Bove, del Aqua-Supp.



**Lyon** have li stradas del Cap-de-Morto, del Musica-del-Angeles, del Svina Pissant, del Gallineria, del Quar Capellas, del Perfect Silentie.

In **Tours** on vide li stradas del Verd Simio, del Volant Serpent, del Mocada.

**Poitiers** possede li stradas del Gamb del Asino, del Corn del Buc, del Pir Cocinat, del Caude del Vacca.

**Reims** have li strada del Foll Reyessa, del Clove-in-li Ferre.

In **Abbeville**, on vide ancor li strada del Limacello, del Ponto del Carruches, del Tri fliccottas, del Mal-Sedent.

In **Lille** ancor : del strada del Cat Bossut.

Ma li max drolli nómin es certmen ti de un strada de **Boulogne-sur-Mer** : strada Escuta-esque-it-pluvia ».

---

**Bernadotte**, simplic adjutant e firm patriot fat tatuar sur su brass in plen revolution, in 1792 : « Morte al reyes ». — Plu tard, il self devenit rey e provat vanmen efaciar li inscription. Mem a su medico il refusat decovrir su brass ma su ancian amicos savet e ridet.



## Polit lettre

Lettre de un chinés redactor a un autor, de quel li manuscrit ha esset refusat: Tre estimat fratre de li sole e li lun!

Permissee me jettar me córam tui pedes! E pos har besat omni pulcades del suol presset de tui genial calcanes, yo humilmen peti te pri permission comunicar te, quo tui fidel

sclavo ha audaciat pensar. Yo ha aprendet in memorie tui bonodorant manuscrit, e si yo vell esser avigilat subitmen in lun-clar nocte, quande li lusciniás canta, li inobliviabil paroles de tui ovre vell esser tis, quel unesimmen vell venir inter mi labies. E yo tutmen ne dúbita, que li lusciniás tande vell silentiar por ne trublár li harmonie del miraculosi paroles, li max bell sub li firmament desde li creation del munde. Ma vé me, si yo hat audaciat comprometter ti celesti paroles per li sordid printcolore e far les li proprietá de populach! Esque vu save, ó sole e lun, quo mi editor vell dir pri to, un mann cruel quam li dente del dracon e rigid quam li barbe del balen? Il vell dir, que tui ovre devet esser li unic model de omni to, quo va fluer ex un plum in li manu de un hom. E il vell postular, que noi omnes — miserabil disciplos de ti nobil arte — de ti moment deve scriir, quam tu scri, tu invidiabil hom, quel ha superat li sole e li lun e li universe. E just pro to, proque yo save, que nequande va esser realisat a me o a mi amicos in minimalissim gradu atinyer li incomparabil bellitá de tui nobil arte de scrition, yo es obligat, durant que yo flexe me in li polve e curva mi fatigat dorse sin audaciar erecter it, retrodar a te tui dulci manuscrit, ti fabulosi colliere de max preciosi perles, tales quales solmen un vez in decimill annus apari sur li superficie del terra.

Mey esser benedit ti hore, quande tui famosi manus denove tasta tui preciosi ovre!


Tui in li polve reptent sclavo.

*Li Shen Tchi.*

(Trad. Yngve Sköld, Stockholm.)

**Nor antecessores.** — Un anglés scientist ha calculat que pos 2000 annus omni hom have circa 139 435 917 489 535 000 antecessores! — Un almanac de 1884 ha publicat lu secuent pri li sam question:

Vor patre e vor matre havet chacun un patre e un matre, it es  $2 \times 2 =$  quar persones. Vor du avos e vor du avas havet patre e matre. Ye li duesim ascendent generation on have do 8 persones. Talmen til li 50-ésim generation (it es til li epoca de Christ) on eleva li numer 2 til li 57-ésim potentie e on constata tande que on besonat 839 245 017 489 535 000 parturitiones por far nascer chascun del persones quel lee ti lineas.







**Fier e pur.** — On raconta que un die un tre bell dama promenat se in un public jardin de Bruxelles, pussante avan se un carrette de infant in quel dormit su unesim nascet.

Un senior incontra la, e es seductet per tant bellità e distinction. Il es tant captivat que strax il vole far quo li ley del Bon Deo interdi.

Il aproxima se... torna un poc... e finalmen parla a illa...: «Seniora, yo desira mult vider vos ho-vèspèr, ye tal clocca, in tal loc, ma sin li bebé».

Li dama fecte ne comprender li francès e credente desembarassar se talmen de un tam monstruosi audaciant, responde in anglès:

«Yo ne comprende francès, senior.»

Li senior save anglès e repeti su rendevu in ti lingue. Alor li bell dama prendente un aspecte tre digni, responde solmen:

«Yo es li princessa Astrid!»

Li mann fuit tot hontosi e balbutiante un excusa.

**Li dormie ante mi-nocte.** Prof. Stockmann de Heidelberg ha fat in ultim témpor quelc interessant experimentes demonstrant un vez in plu quant li hom modern pecca contra li maniere natural viver. Selectente quam object del experiment pluri persones queles sufret de tenaci non-dormie, il vertet completmen li rytme de lor vive omnidial. Il atinyet ti surprisant constatacion secuent: por adultes li moment max favorabil por li dormie es de clocca 7 in vèspèr til circa 11 ½ cloccas in nocte; ti quar hores e demí de dormie es tam re-creatori que ili sufice por redar al organism homan su energies.



Omni ti examinat persones trovat se circum mi-nocte tam refriscat e in tal perfect capacita de labor que til li vèspèr del die secuent illi ne sentit li max litt manifestationes de fatiga. Tis queles sufret pro nerves, specialmen dolore de cordie e nervosi stomac, esset liberat de lor dolores per ti nov maniere de viver. Stockmann repetit sovente li experiment ye li sam persones, obtenente sempre li sam resultate. Il trae de to li conclusion que por chascun hom, 4 ½ hores de dormie, prendet in li témpor indicat, vell esser absolutmen suficient e que chascun vell posser retornar a su labor pos mi-nocte. In realita prof. Stockmann ancor ne explica se omni motives de ti resultate, ma il pensa que il es in coherentie con li prolongation del action del solari radies, si solmen li hom dormi immediatmen pos li cucha del sole.

*Ex Le Journal des Parents (Lausanne).*

---

**Abonnement a Cosmoglotta:** Fr. 4.— sviss; Fr. 30.— francès; RM 2.30; Kc 26.—; 1 dollar; 4 s. anglès; Fr. 27.— belg; fl. 1.70; dan Kr. 4.10; sved Kr. 3.60; L. it. 18.—; 21 Esc.; 13 respons-cupones.



# OCCIDENTAL - LITERATURA

* Editiones mimeografat.	Afrancat
In anglés : * RAXWORTHY A. W. S. : Introductory Grammar .....	SFr. 0.60
* Dr KEMP : Dictionarium Angles-Occidental (in preparation).	
* FEDERN - KEMP - HAISLUND : Occidental-English vocabulary .....	» 0.60
In dan : FEDERN-HAISLUND : Occidental-Dansk Ordbog .....	» 0.50
In finn : T. TATTARI : Occidental Kansainvälinen Kieli .....	» 1.50
In francés : L.-M. de GUESNET : L'Occidental (principes de la langue) .....	» 0.30
* Qu'est-ce que l'Occidental ? .....	» 0.30
* Aux Espérantistes .....	» 0.30
BERGER : L'Occidental en 5 leçons .....	» 0.40
» * Dictionnaire Français-Occidental, 316 p., en cahiers .....	» 5.—
» Solidement relié .....	» 9.80
» * Vocabularium Occidental-Français (2-ésim edition reviset) .....	» 0.50
» * Historiettes in Occidental (avec traduction française) .....	» 0.60
CHANAUD : Index Français-Occidental au Radicarium .....	» 0.80
In german : DIVERS AUTORES : « Occidental, die Weltsprache », 256 S. Leinen 4.50, Geh.	» 3.—
DIVERS AUTORES : « Die Weltsprachenfrage in moderner Auffassung » .....	» 1.20
Mag. phil. A.-Z. RAMSTEDT : Occidental Kursus in 10 Lektionen .....	» 1.20
GRABER ERNST : Wörterbuch Occ.-Deutsch und Deutsch-Occ. ....	» 1.—
* BLASCHKE : Der Kampf um die Weltsprache .....	» 0.50
JANOTTA : Leitfaden der Weltsprache Occidental .....	» 1.—
OCCIDENTAL, Begründung, Grammatik, Wortbildung .....	» 0.50
GÄR : Wörterbuch Deutsch-Occidental. Gebunden 5.30, Brosch .....	» 2.50
* Dr SCHRAG, Dr ASCHWANDEN, Dr NIDECKER : Die moderne Weltsprache .....	» 0.50
* Historiettes in Occidental (con trad. german) .....	» 0.60
FEDERN : Occidental-Grundlage für einen Internat. Terminol. Code .....	» 0.50
In italian : * J. RITTER : Curs de Occidental por Italianes .....	» 0.30
* Dr Ing. DAL MARTELLO : Corso in 3 lezioni per corrispondenza .....	» 0.60
* FEDERN-RITTER : Vocabolario Occidental-Italiano .....	» 0.30
Dr Ing. Prof. A. PICCHI : Stato attuale del problema della L. I. ....	» 0.80
In hispan : FEDERN-PEDRERO : Clave Occidental-Hispan (in preparation).	
CEBREIROS : Grammatica in hispan (in preparation).	
VARELA : Curs per correspondentie in 5 lecciones .....	» 0.50
In portugales : * Curs de Occidental .....	» 0.30
In ruman : ESCHENASY : Grammatica in ruman .....	» 0.60
ESCHENASY-HANT : Vocabularium Occidental-Ruman (in preparation).	
In russ : KOFMAN : Grand dictionarium russ-occidental (pret a printar).	
E. DE WAHL : Occidental por international relationes (clave 8 p.) .....	» 0.20
In sved : Dr C.-E. SJOSTEDT : Occidental de internationella ordens språk .....	» 0.40
Mag. phil. A.-Z. RAMSTEDT : Occidental, ett västerländskt kulturspråk .....	» 0.30
» Nyckel till Occidental .....	» 0.80
Dr B. BLOMÉ : Lärobok i Occidental, 72 p. ....	» 1.80
Dr C.-E. SJÖSTEDT : Dubbel Occidental-ordbok, 98 p. ....	» 1.80
C.-W. von SYDOW : Occidental eller Esperanto .....	» 0.50
K. SEGERSTAHL : Hjälpsspråksfrågan .....	» 0.40
In tchecoslovac : O. MULTIS : Problem reci mezinárodní .....	» 0.50
J.-A. KAJŠ : Ucitel svetomluvy .....	» 0.50
J. PODOBSKY : Co je Occidental ? .....	» 0.20
KAJŠ-PODOBSKY-SVEC : Slovník Česko-Occidentalský .....	» 1.50
J.-A. KAJŠ : Occidental, moderné rec mezinárodní .....	» 1.—
* SVEC - PODOBSKY - FEDERN : Slovník Occidentalsko-Cesky .....	» 0.60
Publicaciones por esperantistes : Occidental au Esperanto .....	» 0.30
Vocabularium Esperanto-Occidental e Occidental-Esperanto .....	» 0.30
Esperanto als Welthilfssprache .....	» 0.20



## PUBLICATIONES IN OCCIDENTAL

	Afrancat
AMICIS: Manuel Menendez (Ovre 6) .....	SFr. 0.60
BALMONT K.: U es mi hem? (Ovre 2) .....	» 0.60
BERGER: Curs de Occ. in Occ. ....	» 0.50
» Historie del Lingue international (Cosm. nr. 116) .....	» 0.50
* » Vocabularium del centres de interesse .....	» 2.—
* CREUX: Stenografie Duployé por Occidental .....	» 1.—
* » Rythmica in Occidental .....	» 0.60
* CREUX e BERGER: Li origines de Occidental .....	» 0.80
DIVERS AUTORES: Crestomatie de Occidental .....	» 1.50
* FEDERN Ilmari: Lexico Occ.-Occ (in preparation) .....	» 6.50
De GUESNET: Manuale de conversation .....	» 0.40
GUILBERT-DEMINGER: Vocabularium Occ.-F.A.G. (por li tomes 1-6 de Ovre) ...	» 0.75
* HEINI: Li via al prosperità .....	» 0.50
* Ing. HOERBIGER: Quo Occ. presenta al german ingeniero .....	» 0.50
* Ing. JANOTTA: Construction de un terminologic code .....	» 0.30
JANOTTA: Julius Lott, precursor de Occidental .....	» 1.20
* LITTLEWOOD: Vers un lingual instruction plu rational .....	» 0.50
MASARYK: Democratie e Humanità (Ovre 5) .....	» 0.45
PIGAL: Essentie de Occidental (Cosmoglotta Nr. 56) .....	» 0.50
PODOBSKY J.: Li astres del Verne (original poemas) .....	» 0.80
POE: Un descense in Maelstrom (Ovre 4) .....	» 0.60
R. ROLLAND: Europa e Asia, con vocabularium (Ovre 1) .....	» 0.60
TAKUR: Nationalism in Occidente .....	» 1.10
E. de WAHL: Radicarium directiv in 8 lingues .....	» 3.—
» Spiritu de Occidental .....	» 3.—
Ancian collectiones de Cosmoglotta. Secun li annus .....	de fr. 4.— a » 30.—
Ancian collectiones de Helvetia, per annu .....	» 2.—
Divers: SKÖLD-PODOBSKY: Tri canzones. Du canzones (por un voce e piano) chascun	» 1.50
Prospecte in Occidental por adjunter in lettres, 10 ex. gratuit; chascun in plu .....	» 0.02
Covertes, postcartes con propaganda-textu, 100 ex. ....	» 1.50
Marcas glutinabil, 100 ex. ....	» 0.80
Insignie .....	» 1.50
Omni ti libres es recibibil de: Institute Occidental, CHAPELLE (Vd), Postchec-contos; Lausanne	
II.1969; Berlin 1683 36; Bruxelles 3504 45; Copenhag 269 72; Paris 1765 46; Stockholm 74 395.	

## COSMOGLOTTA

**CONDITIONES DE ABONNAMENT.** Li precie de un simplic abbonament es li corespondent valore de Fr. 4.— sviss o 13 respons-cupones. Ti quel misse Fr. 7.— sviss recive 3 exemplares (abonnament de propaganda). Li precie del abbonament in li moné del divers landes es indicat sur li ultim págine de chascun numeró. — Li abbonament a Cosm. es annual, departe del 1-esim de chascun mensu e continua til li scrit revocation del abbonator. On posse inviar li abbonament al secuent adressas:

ANGLIA: H. D. Akerman, 84, Fernleigh Road, Winchmore Hill, LONDON N. 21

Leonard Beer, 40 St. Rule St., LONDON, S. W. 8

BELGIA: Institute Occidental, CHAPELLE (Vd), Svissia (Pch. Bruxelles-Brussel 3504.45).

CUBA: Bonneval e Fuentes, Arguelles 204, CIENFUEGOS.

DANIA: Institute Occidental CHAPELLE (Vd), Svissia (pch. Köbenhavn 269 72).

ESTONIA: Kosmoglott, Eha 10, TALLINN.

FRANCIA: L.-M. de Guesnet, 83, Rue Rochechouart, PARIS 9 (pch, Paris 26437).

Institute Occidental, CHAPELLE (Vaud), Svissia (Pch. Paris 1765 46).

GERMANIA: Heribert Rosenlecher, PANA-Universal-Buchversand, WIESBADEN-BIEBRICH  
(Pch. Frankfurt a/M. 44977).

HISPANIA: C. Varela, Macia 5, FIGUERES (Cat.).

ITALIA: Dr Ing. E. Dal Martello, San Silvestro-Casellario, 81, ROMA.

NEDERLAND: H. Littlewood, v. Panhuysstr. 18 A., GRONINGEN.

PORTUGAL: R. de Beça e Melo, Av. Sac. Cabral 56, PENAFIEL.

RUMANIA: Aurel Eschenasy, Calea Brestei 27, CRAIOVA.

TCHECOSLOVACIA: Jos. Svec, Skroupova 2, PRAHA VII (Pch. Praha, Nr. 9.438).

SVEDIA: Sved Occidental Federation, Box 171, STOCKHOLM (pch. Stockholm 70 315).

» Institute Occidental, CHAPELLE (Vd), Svissia (pch. Stockholm 74395).

SVISSIA e altri landes: Institute Occidental, CHAPELLE (Vd), (pch. II. 1969).

U. S. A.: M. K. Gardner, 803 State Street, MADISON (Wis.)